

**FAAVAE O LE POLOKALAME A
FAILAUGA**

TULITULIMATĀGAU

(Continuing Theological Education)

Copyright © 2019 Piula Publication, Samoa



FOLASAGA

O le Tulitulimatāgau, e afua mai i le vaogagana o talatuu a Samoa. O tala e ta'ui ai ona talitonuga faa-filosofia po o le tōfāpoto, i le soifuaga fesoota'i o tagata i ana tu ma ana aganuu e afua i lona si'osi'omaga ma tuāelele. O le a taoto le talatuu leaga e talalasi le atunuu. A o lona faaogaina i le faamoemoe o le Ekalesia Metotisi i Samoa, ina ia pipii ma le elele le faatinoga o le manulauti a le Ekalesia; ia faaauau le a'oa'oina o ona tagata i le Finagalo paia o le Atua, faapea ona Talitonuga ma ana A'oa'oga. O le agaga ina ia aua nei motusia, a ia tulituliloa pea e ala i Polokalame faatatauina. O le Tulitulimatagau ua faapitoa i le a'oa'oina faaauau o Failauga ma Taitai o le Ekalesia. Sa tauaveina lea galuega tele i le Matātā o le Tulitulimatagau i le Ofisa Tutotonu o le Ekalesia mai tausaga e tele ua mavae. Peitai, o lea ua tuuina aloa'ia mai i le Kolisi Faafaifeau i Piula, i le pule ma le faai'uga a le Koneferenisi 2019.

O LE FAAVAE O POLOKALAME MO FAILAUGA MA TA'ITA'I

E leai se Polokalame faatino e aunoa ma sona faavae faa-Mataupu Silisili. O le fetalaiga a Iesu i lona ausoo,

"Ua tuuina mai ia te a'u le pule uma lava i le lagi ma le lalolagi. O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia; ia outou aoao atu ia te i latou ia tausii i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi." (Mataio 28: 18-20).



Ua faapea foi ona tofia Failauga ma Taitai e afua i le Talitonuga o le Ekalesia i le Faifeau *o tagata uma ua talitonu* (Priesthood of all believers). Na faauuina ai e Sione Uesile ni Failauga mo le Galuega saili agaga i Amerika, ma ua faaaauau pea lea faatuatuga o le Ekalesia Metotisi i Failauga, e oo mai i lenei taimi.

O le valaauina o le Failauga o le Ekalesia Metotisi.

I le Talitonuga faa-Metotisi aoao i le lalolagi,¹ ua valaauina Failauga e auai i le Galuega a le Atua: o le saili o agaga ma tausia ia agaga mo le Atua e ala ia Keriso Iesu. E ao ai ina silafia e le Failauga, o le faamoemoe foi lea o le Ekalesia Metotisi mo i latou, na afua ai ona valaauina. E ao ai ina latou vaai i le lalolagi ma le Ekalesia mai *mata* (lenses) o le Mataupu Silisili (Upu/Finagalo o le Atua), po o *mata* o le soifua faale-Agaga. E ao foi ina pulea e lea lagona o latou manatu (finagalo) ma faai'uga latou te fai, ma molimau atu ai i le lalolagi o lo o moomia le alofa tunoa o le Atua. Lona uiga, e ao ina atagia i le soifua ma le galue a le Failauga o le Talalelei mea nei:

- 1. O le mafai/agavaa e faasino ai ma tata'i tagata ia latou iloa le Atua o lo o galue mo le faaolataga o le lalolagi.**

¹ Na fā'ifa'i mai nisi o nei manatu mai le Ta'iala mo Failauga a le Ekalesia Metotisi Peretania (MCB), ma le Ekalesia Metotisi i Amerika (UMC). O lo o taumulimuli foi i Faiga Faavae a le Ekalesia Metotisi Samoa, *O le Faavae & Tulafono*. Ekalesia Metotisi Samoa, Matafele 2017, Faavae Parakalafa 12-17, Tulafono Parakalafa 7, O le Fono Failauga, Fesili 2,3,4,5 itulau 40. Misi Alatis, ***O le Taiala mo Failauga***. Methodist Printing Press: Malifa, 1983



2. *O le mafai/agavaa e molimau ai le Talalelei ia Iesu Keriso ma le talitonu atoatoa, faapea ai foi lona malamalama i le si'osi'omaga (tu ma aganuu) o si'omia ai lana galuega molimau.*
3. *O le mafai/agavaa e taitai ai sauniga a le Ekalesia (ua faatagaina ai o ia) ma lauga atu le Tusi Paia ma le malamalama, talitonu atoatoa i ai, ma le maelegā e sailili.*
4. *Ia talitonu ma maelegāina Talitonuga Faavae o le lotu Kerisiano, faapea ai ma Talitonuga, A'oa'oga faa-Mataupu Silisili, Faavae, ma aga masani o le Ekalesia Metotisi i Samoa.*
5. *Ia magafagafa foi i le taua o le aiga Metotisi i le Lalolagi, faapea le va fealoaloa'i ma isi Ekalesia Kerisiano.*

O le aiga Failauga, o Ta'ita'i o le Lafumamoe.

O le Fono a Failauga, o le isi lea ala e faailoa ai le Galuega faa-ta'ita'i a le Failauga i le lafumamoe a Keriso. O le auai ma galue malosi e faasoa ma le Faifeau faapea isi Failauga i le fono lea, faapea le laugaina o le Upu o le Talalelei ma le taitaiina o sauniga, e atagia ai le galulue faapaaga (partnership) o le aiga Failauga o i latou o Ta'ita'i mo le viiga o le Atua e ou le feau ma le Galuega. E taua le Fono a Failauga e sufi ai i latou ina ia:

1. *Faaa'upegaina atili ai mo le Taitaiina o Sauniga Lotu e ala i le faasoa mai o isi ona uso o le aiga Failauga.*
2. *Iloa ai ma malamalama i fuafuaga o le Galuega faale-Agaga a le Faifeau ma le aiga Failauga mo le lelei lautele o le lafumamoe.*



3. *Tulitulimatagau ai pea le aoaoina ma le malamalama atili i lona valaauina o le Failauga o le Talalelei e le gata mo lana lava aulotu/matāgaluega, ae faapea foi le faamoemoe o le Sinoti ma le Ekalesia i le Galuega saili agaga mo le Atua.*

Tulitulimatagau (A’oa’oina Faaauau) ina ia faaa’upegaina atili.

O le avea ma Failauga po o le soo o Keriso, o se Malaga paia (pilgrimage). E ao ina tiu *faa*-matalā’oa, ma faaaauau pea ona saili i mea fou (new learnings) ina ia tupu le silafia ma le faatuatua e uiga i lona valaauina, faapea lona iloa atili o le Atua ma lona Finagalo. O le Failauga maelegā e ao ina fiafia e saili ma aoao manogi i mafaufauga faa-Mataupu Silisili, faapea le silafia o le Tusi Paia, e faatumu ai lana utu. E le gata e mo le lelei o lona lava olaga, ae faapea foi le faatinoga o le faiva o le Failauga. Lona uiga, o Failauga e loto i le Galuega e latou te finau e sailiili mo le a’oa’oina faaaauau. E ao foi la ina mata’itū i le Fono a Failauga itu nei mai Failauga uma o le aulotu ma le Matagaluega.

1. *la atagia le faamaoni e faitau, ma su’esu’e i le Tusi Paia.*
2. *la atagia le to’aga o le Failauga i A’oa’oga faaaauau ua saunia e le Faifeau, le Sinoti po o ni Polokalame foi mai le Tulitulimatāgau a le Kolisi Faafaiifeau.*
3. *la ‘alo’alo ese mai nisi a’oa’oga e le o ni Polokalame a le Ekalesia, ae ia toaga i aso faa-vasega, masina fou, ma Mafutaga a Failauga.*
4. *la toaga e a’oa’o Talitonuga Faavae o le Ekalesia, o lona Talafaasolopito, ma ia manatua pe tauloto foi a’oa’oga*



masani e pei o le Kiriti a le au-Aposetolo ma le Faatuatuga o le Ekalesia. E taua tele foi le a'oa'oina i lauga a Sione Uesile ma pese a Sale Uesile pe afai e talafeagai.

- 5. la to'aga i Fono a Failauga ma Ta'ita'i.*
- 6. la lava foi lona iloa ma le silafia i mea e tutupu i le atunuu ma le lalolagi e ala i tala fou ma tala o mea e tutupu i le lalolagi. la vaai i ai faa-Mataupu Silisili, aemaise o le fesootaiga o ia mea uma i le Finagalo paia o le Atua, e faufau ai sana tali atu i le lafumamoe mai le vaai faa-Kerisiano i ia mea uma.*

O le va fesoota'i o Failauga ma le lafumamoe.

O le fesootai atu i le lafumamoe, o le fatu lea o le Galuega molimau a le Failauga. Se a le aoga o le tele o le iloa ma le tele o meaalofo ua faaa'upegaina ai le Failauga ae le mafai na fesootai atu ina ia malamalama ai tagata lotu? E ui ina tatou manatu i le taua o le gagana ma upu i le fesoota'iga lea, ae ao lava foi ina lauga ma molimau le tagata atoa o le Failauga i le alofa o le Atua e ala ia Keriso Iesu. E ao foi la ina mata'itū i le Fono a Failauga itu nei e ao ina maua e Failauga uma o le aulotu ma le Matagaluega.

- 1. la iloa ona faitau tusi ma tusitusi, ma masani i le Faitauina o le Tusi Paia ma le tusia o lauga ma le molimau i tagata lotu.*
- 2. la atagia lona mafai ona lauga ma le malamalama i lana Mataupu, talitonu i ai ma le atoatoa, ma ia atagia le aga'i i luma i taimi uma i soo se si'osi'omaga o lo o molimau ai.*



- 3. *la atagia foi le agavaa e tautala ai ma le manino ma le lototele e uiga i le Atua, le Faatuatuaga Kerisiano ma le galuega faa-soo o Iesu Keriso.***

A fua i manatu faavae o le Polokalame mo Failauga ma Ta'ita'i ua tuuina atu i luga, e le o se mea māmā le valaauina e avea ma Failauga o le Talalelei. E tatau ai foi ona matuā mataala ma mataalia le Ekalesia i le a'oa'oina faaaauu o ana Failauga e ala i ni Polokalame saunia lelei. E taua foi le sao o le Aufaigaluega galulue, ina ia maelegāina le Fono a Failauga, ona e le itiiti lona taua i le faamalosiā o Polokalame ua fuafuaina atu e le Tulitulimatāgau (*Continuing Theological Education*) a le Kolisi i Piula. O le faamoemoe autu, ia maua ni Failauga tapena lelei mo le Galuega saili agaga, faaola agaga, tausi agaga a le Ekalesia Metotisi i Samoa.

Kolisi Faafaifeau i Piula
Setema 2019